


VOILA⁷⁰

s'Cliqueheftli vo de Basler Rolli



Januar 2023

Basler Rolli Jungi Garde & Stamm TERMINKALÄNDER

Wenn	Was	Wär
SA 28.01.-11.02.2023	Charivari	Stamm
FR-SO 03.-05.02.2023	Laaferi	JG
SO 19.02.2023	Allschwiler Fasnacht	JG
SO 26.02.2023	Ladärne Ypfyffe	Stamm, JG, AG
MO-MI 27.02.-01.03.2023	Fasnacht	Stamm, JG, AG
SO 12.03.2023	Bummel	Stamm
SO 19.03.2023	Bummel	JG, AG
DO 23.03.2023	Lämpesitzig	Stamm, JG, AG
DO 30.03.2023	Probelektion	JG

Die aktuelle Termin von der Alte Garde würde über's Internet mitteilt



FRAUEBUMMEL

HANNAH

MAJA

ROUTEPLAN

PROLOG

HERREBUMMEL

TAMARA

MARSCHLISCHE

BUNTE OUBE

W I E H N A C H T E

LEA

QUIZ

JULIAN

TERMIN

JARI

CHANTAL

EUROPA PARK

Liebi Rolli

Es schmeggt nach Fasnacht! Während hinter de Kulisse munter alles für die drey schenschte Dääg vorbereitet wird, trätte mir jede Oobe fröhlich uf dr Charivari Bühni uff. Ich frog mi amme, wo gwüssi Rolli die Idee und Energie här nämme. I glaub, dass eifach d Vorfreud uf all die Aläss uns allewyl motiviert, mit unsere Gspänli zämme grandiosi Uftritt z plane. Denn genau s „Zämmesi“ isch jo dr Sinn vonere Clique. Voilà. Und dass das bi uns gruppierigsübergriffend - also Stamm, JG, BRAG - immer wie besser funktioniert, macht uns einzigartig! Dorum lönd uns eifach jede Momänt vo däre Vorfasnachtszyt gniesse, denn d Fasnacht kunnt in grosse Schritt uf uns zue. Jetzt gits kei Zrugg me. Und das alles fiehrt uns wieder zue mim erschte Satz: Es schmeggt nach Fasnacht :)

Härzligscht,
Nadine



s Voilà Team

Inhalt Stamm, Dätschmaischtere, Vrsand: **Nadine Nickler**

Mitässer & kreativi Mitdängger: **Andrea Häner-Roth, Lara Petralli, Marcus Hablützel**

Inhalt Jungi Garde: **Michèle Emmenegger**

Inhalt Alti Garde: **Thomas Wyss**

Adrässänderige: **baslerrolli@gmail.com**

Redaktionsschluss Voilà Nr. 71: ???

Druggerei: **Reproline GmbH**

Titelsyte: **Dr Voilà im Röppliräge**


<http://www.baslerrolli.ch/>



by uns findsch alles
wo's bruucht
zem feyn kenne ruesse

Aluminiumdrumml
Messingdrumml
Holzdrumml
Schlegel
Bandalier etc.

Allschwilerstrasse 34
4055 Basel
061 271 79 19
www.trommelbau.ch



Büchler
Trommelbau
Basel



Bye bye & Willkommen, aber vor allem: DANGGE!!!

BRAG: Unsere Thomas isch tatsächlich sit gschlagene 15 Jahr im Voilà Team! Jetzt hett er sich entscheide, dä gschätzti Platz frei z gä, um sich andere Aktivität z widme. Sini zueverlässigi Art ha ich sehr gschätzt, denn uf unsere Thomas isch eifach Verlass! Regelmässig hett er alli Gschehnis us dr Alte Garde zämmegfasst oder vo Gschpänli schriibe lo. So hämmer immer genau gwüsst, was bi dr ältere Generation so lauft unterem Jahr. @ Thomas: Vylle härzlige Dangg für di unermiedlige Ysatz!

Die neu triibendi Kraft für d BRAG wird dr Ärnst sy. Ich freu mi scho sehr uf d Zämmearbet und wünsch ihm im Name vom Voilà Team e guete Start!

Stamm: Kurz nachm Thomas, nämlich im 2009, folgt ihm dr Marcus ins Team in dr Funktion als Mitässer. Do frogt sich villicht e Mänge vo euch, was me denn als Mitässer für Talänt muess mitbringe. Es isch eso: Wie s Wort scho seit, ässt er immer mit - duet aber au oft s Voilà Team kulinarisch vrzaubere. Er bietet so quasi dr Rahme für unseri erfolgriche und amme sehr luschtige Sitzige. Und do drbi entstöhn nid sälte gueti Idee, wo ich natürlich meischtens grad umsetze due. Aber au unter em Jahr liifert dr Mitässer immer wieder läsenswärti Bricht oder luschtigi Rätsel. Ihr sehnd, das isch e ganz wichtigi Rolle innerhalb vom Team. Wär sich also will zuekünftig zur Verfielig stelle, dörf sich gärn mälde unter baslerrolli@gmail.com.

Und au do @Marcus: Merci vyyylmol für all dini Ysätze, wo du für s Voilà gmacht hesch!

Härzligscht, Nadine



Hoi zämme, ich bi d Lea Bezzola und 22 Jahr alt. Ahgfange Pfiffe hani bi de Junge Garde vo de Pierrot Clique und ha denn e langi Pause gmacht mit Fasnacht, wills mi nüm so packt gha het. Ich ha aber immer gwüsst, dass ich gärn wieder will Fasnacht mache, jedoch numme mit tolle Lüt um mich ume und so bini uf euch gstosse.

Ich studier momentan Jura an de Uni Basel und schaff näbebi imene Restaurant im Service. In minere Freizit tue ich sehr gern läse und mini Zit mit mine Fründe und minere Familie verbringe.

Ganz liebi Grüessli und uff e tolli Fasnacht.
Lea

Ybi vor 35 Joor in Basel gebore und ha mit de Eltere und mim jüngere Brueder im Grossbasel gwohnt. D'Basler Fasnacht begleitet mi scho mi ganzes Läbe. Y bi in ere Fasnachtsfamilie gross worde und woni 6 worde bi, hani sälber afo Drummle leere in dr Junge Garde vom Barbara Club 1902. Woni denn 18 Joor alt worde bi, hani in Stammverein vom Barbara Club derfe wägsle. Dert hani vieli Joore mit mine Eltere und mim Brueder zämme Fasnacht gmacht.

Mit 28 Joor bini denn zuesätzlig de Hypokras Basel biträte, um als Erweiterig zum Einzelwettspieldrummle mit ere Gruppe an Wettspiel teil näh z'könnene. Dert hani e super Zyt verbrocht und bereits einigi Rollis derfe kenne leere. Mitlerwyyle bini nym aktiv bi de Hypokras derbyy.

Do s'Drummle fiir mi e Liideschaft isch, begleitet mi das natürlig au in minere räschtlige Freizyt und y ieb gärn elei aber au in Gruppe für Wettspiel oder au eifach wäg dr Freud an dr Sach. Näbscht däm duen y in minere Freizyt au gärn Bike, Jogge und Reise und verbring gärn Zit mit mine beide Katzebuusi.

Mini Eltere sin, woni 14 Joor alt gsi bi, ufs Land zoge und y ha dert ca. 10 Joor gwohnt ka. Es het mi denn aber wieder zrugg in d'Stadt zoge und y läb jetzt zämme mit mim Partner im Glai Basel.

Brueflig bini Sozialarbeiterin und schaff im Beriich vo dr gesetzlige Sozialarbet.

Y bi jetzt sehr gspannt uf s'erschte Charivari und vor allem au uf die erschte Fasnacht mit euch Rolli.



Aktuells / Hochzyt Chantal

Liebi Rolli

Nomol härzliche Dank für das tolle Ständeli an unserer Hochzyt! Mir hän dä Daag, au dank euch, sehr könne gniesse.

Liebi Griess
Chantal & Bashkim



HERZLICH WILLKOMMEN





Mir sinn stolz, dr Jari dörfe vorstelle, wo am 15.12.2022 gsund uf d Wält ko isch. Mir gniesse jede Momänt mit ihm: Wenn er hungrig isch, in d Windle macht, ufmerksam d Wält entdeckt und uns im Schloof mängisch e Lächle schänggt. Mir sinn übergglücklich, jetzt z dritt z'sy!

Jacky, Jan und Jari



Julian Andri

14. Oktober 2022



Unendlich dankbar und glücklich über die Geburt von

Julian Andri

freuen wir uns auf unser Abenteuer mit Julian.

Andrea & Cyrill mit Emilia

Mir dangge an däre Stell em Dominique Wegmann für syni Unterstütztig zur Erstellig vo de druggfertige Voilà-Noote. Nadürlig het das nid uff Aahieb klappt, was nid si Verschulde gsyy isch und me synere Stellignahm zum letschde Mailverkehr ka entnäh ☺.

«Sodeli» oder «Nuunefirzli»-noonemol, doo also «dr 3. Värs» vo däm «Luuser», schprich die drei druggfertige Noote-PDFs vom «Voilà», dasmol wie vo euch «Veegel» gwünscht ooni dr BR-Ladäärne-Punggt – für alli «Gässler», «Bänggler», «Brite», «Neye Glaibasler» und «Schlauracher» doo «z'Basel am mym Rhy» und rund ums «Spaledöörli».

Dr «Fritzli» hofft, ass jetze alles «rossignelli» isch, sunscht föhl ich mi als «Hofnaar» oder «Naarebaschi», wird zum «Grien Hund» und hol dr «Glopfkaischt» uuse; oder ich bruuch ganz aifach ganz viil «Calvados», «Whisky Soda» und «Gin and Tonic» bis zum «Gluggsi»... – kurzum: sunscht goht's em «Unggle Sam» langsam uff e «Saggodo» oder «Dudel-sagg» und ich bloos euch no mee Basler Fasnachtsmärsch um s «Ohre-miggeli»!

Aber doo mir die mit em «Sixty-Nine» natüürlig nit am «Aeschlemer» verbii gönn, ha ich's gärn gmacht. In däm Sinn: «Let's go».

Liebe Griess vom «Dreier».
Dominique





Wie heiss ich? Hannah Wenk

Wie alt bin ich? 7 Joohr alt

Was mach ich bi de Rolli? Ich lauf im Vortrab

Worum bin ich bi de Rolli? Will ich will Fasnacht mache und wäg mim Brueder

Was hätt ich gärn an dr Fasnacht zum z'Nacht? Omelette und Nutella

Welles Gosdym hätt ich emol gärn an dr Fasnacht? E Ueli

Was für Hobbies ha ich no näbscht de Rolli? Ich tanz, ich schwimm und ich turn

Was möcht ich an dere Stell no gärn sage? Ich freu mi uf die nägscht Fasnacht mit mim Brueder

Alli do? Guet denn könne mr abfahre! S'isch Sunntig Morge am 7:45. Alli sehr mied aber d'Vorfreud uf de Europapark isch gross. Nach däm alli in Car iigstige sind isch d'Reis nach Rust ändlig losgange...

Ändlig gseht meh die erste Bahne scho. D'Vorfreud wird immer grösser. S'Wätter het zum Glück au mit gspielt. Womer denn in Park sind hämer no e kleins Usflügli mit de Yysebähnli durch de Park gmacht. So hämmer doch no alli zämme öbis gmacht und nid nur in de Gruppe wome uns yyteilt het. Wies eso isch wenn s'Wätter guet isch, denn hets au sehr viel Lüt. Darum hämmer immer sehr lang miesse ahstoh. Aber das ganze Ahstoh macht au hungrig. Darum hämmer ganz ganz viel gässe. Zum Glück kamme im Europapark ganz viel verschideni Spezialitäte vo verschiedene Länder probiere. De ganzi Park isch gschmückt gsi mit grussliger Halloween Dekoratione.





Mir hän uns denn am spätere
Nomtittag au ufe Wäg gmacht.
Natürlig hets Gruppefoti au nit
dörfe fähle. Das hämer denn no
vorem Yygang gmacht damit mr
e tolli Erinnerig hän. Mir hän uns
denn ufe Wäg nach Basel gmacht
und sin uf die 7ni wieder an de
Gartestross ahkoh.
E Grosses Danggeschön an alli
Organisatore und Betreuer, wo dä
Ussflug möglich gmacht hän. Es
isch e super tolle Daag gsi.

Guilia



Nochwuggs / „Bunte Oobe“, 29.10.2022

„Ändlig isch es wieder so wit, es git e Bunte Obe!“, hämr im Summer gseit, womr im Grarte grilliert hän. Aber mängmol kunnts 1. anders und 2. als me dänggt.

Noch viele Bemiehige und kreative Idee vom OK het dä bunti Obe wäge z wenig Amäldige leider miesse abgseit wärde:

Carla:

wäge euch! Mäldet euch doch a, wenn s öbbis isch!

Isabella:

s isch halt bitz kompliziert, ganz eso eifach isch es nid, das muesch ebbe au verstoh.

Und jetzt?

Carla:

Grossi Freud het gherrscht, wo s Mail vo dr Irina ko isch, dass sie, d Jessy, Brian und dr Patrick öbbis uf d Bei stelle für uns. Und so isch es ko, dass mir uns an däm 29. Oktober bim Stücki troffe hän und dört sin go bowle. S isch sehr lessig gsi mit de Kamerädlı z bowle! Noch em bowle sin mr mit em Bus in Gliggekäller gfahre und dört hets e Chipsrundi und z trinke gä. S het Pizza zum Znacht gäh, die eine hän UNO gspielt, die andere gredet, d Dambuure hän wie immer ummehöbberlet und gli emol het d Nina ihri Discokugele ufgstellt und **denn isch es los gange**.

Isabella:

Wie cool isch das denn, die Junge mache öbbis! Und mir Alte hogge planlos umme? Nei, das kas nid sy, und so isch es passiert, dass mir z 6t im Schofegg e feins Fondue gässe hän. Es isch e kleini aber feini Rundi gsi und ich ha die Rollirundi sehr gnosse. Zmitzt im Riehre vom flüssige Kääs: e verdächtigs Bling, und zwar bi allne 6. E Blick ufs Telefon het uns e Yblick gä, was in unserem Gliggekäller grad abgoht und es het uns also sehr berieht. Und **denn ischs los gange**.

Carla:

D Playlists sin heiss gloffe und alli hän danzt. Viel z schnäll isch 10ni worde und mir hän gwüsst, bald isch Füürobe. S het gheisse, als Abschluss gits no, ihr ahnets. EWIGI ROLLI

Isabella:

Schnäll isch klar gsi: mir wänn öbbis mache, wänn de Junge und de Be-treuerInne d Ehr erwiese. Mr hän dr Roseverkäufer glücklich gmacht und sin mit 20 Rose im Arm in Richtig Käller los gloffe. Grad wo mr vor dr Düüre stöhn, ghöre mr: EWIGI LIEBI, also ihr wüsset scho.

Carla:

Grad bi dr Rollisüüle goht d Düüre uf und 20 Rose sind in Ruum gschäbbt. Drhinter 6 Stammrollis, wo uns die Rose gschänggt hän und in dr Mitti abdänsed sin. S wär mr jo eigentlich peinlig, aber mir sin jo e Familie.

Isabella:

Bim Referain simr inegschwäbbt und hän e unglaublichs Bild vor uns ka: unseri Jungi Rollisüüle. So schön, s isch fascht zum hüüle. Mir hän d Tränli abgespielt mit eme Prosecco, hän no bitz mitgfeschtet und die Bandi denn wieder sich sälber überloh.

Do gohts zue de legendäre Videos!



Nochwuggs / „Bunte Oobe“ / Teil 3

Carla:

Jetzt isch scho 10ni verby gsi. Mir hän alli e Problem ka, mir hätte hei solle, aber keine het welle. Leider simr am Schluss nur no kleineri Gruppe gsi, mr hän bis am 12i witter Party gmacht und s isch lessig gsi bis am Schluss. Mr hän am Schluss no dr Käller ufgruumt und bitz putzt und e Rose-Danke-Foti gmacht. Irgendwann isch denn halt trotzdem Füürobe gsi und mir hän uns versproche: das mache mr gli wieder emol! Mit oder ohni Stamm.

Isabella:

Bim Schlummi im Schofegg hämr alli die schöne Fotelis agluegt, wo im Lauf vom Obe ko sin. Vieli hän sich troffe, s het Föteli vo Apéros, Nachtässe, privat und in dr Stadt etc. gä. Und so isch e wunderbare Obe voller Überraschige z Änd gange und es isch am Schluss trotz allem e Rolliobe worde. Mir hän uns versproche: E Fondue im Schofegg gitz gli wieder emol, mit oder ohni Jungi!

Und s nägscht Mol, egal ob im Käller oder im Zickzack
Amälde, hopphopp, zackzack
Will zämme fyyre, das isch schön zum hüüle
Vor allem binere grosse gmeinsame Süüle.

Für die Junge: Carla
Für e Stamm: Isabella



DUESCH IM VOILA INSERIERE - DUET DI GSCHÄFT RASANT FLORIERE!

Voilà	Cliqueheftli vo de Basler Rolli		
Erschynigsturnus	vierteljööhrlich		
Ufflaag	rund 300 Exemplar		
Bryse	1 Syte	1 Ussgoob	90.- Frangge
	1 Syte	4 Ussgoobe	270.- Frangge
	1/2 Syte	1 Ussgoob	50.- Frangge
	1/2 Syte	4 Ussgoobe	150.- Frangge
	1/4 Syte	1 Ussgoob	30.- Frangge
	1/4 Syte	4 Ussgoobe	90.- Frangge
Druggvorlaag	Grafikdatei Grössli maximal 10 x 15 cm Dateiformat TIFF oder .png oder .jpg oder .pdf Ufflöösig mindestens 200 dpi		

Mir dangge ganz hätzlig für Ihri Unterstützig!

Basler Rolli

Basel, im Januar 2023

Nochwuggs / Yebigsdaag 20.10.2022

Dr Ybigsdaag isch sehr schön gsi mir hän wieder alli zämme könne uns gseh nach de Herbstferie. Am 22. Oktober sinn mir am viertel vor 10i bim Sekundarschuelhus in Birsfælde gsi. Mir hän dr Voilà und dr Wettschteimarsch giebt.

Zerscht hän mir alli in kleine Gruppe giebt und nochär alli zämme dr Wettschteimarsch in dr Aula.

Nach dr Mittagspause hän mir in, vo dr Irina gmachte, Gruppe Idee für unsere Uftritt am Laaferi gsuecht. Drnoch hän mir, die wo dr Voilà spiele, am Fasnachtsbändeli dä no giebt die andere hän denn scho frei kah und hän sich könne vorbereite für dr nächschi Daag.

Mir wo für's Fasnachtsbändeli giebt hän, hän denn au noh dr Uftritt vo de Tamboure giebt und mir Pfyffer hänn lernt kah, wie mir drzue passend könne Fahneschwinge, was mit dr Zyt rächt okay klappt hett :)





optik
schneider

Optik Schneider AG
4009 Basel
Spalenring 15
Tel +41 61 381 91 91
optik-schneider-basel.ch



musik **oesch** basel
DAS FACHGESCHÄFT FÜR BLASINSTRUMENTE

Spalenvorstadt 27 • 4051 Basel • 061 261 82 03

R	A	S	M	A	R	S	C	H	U	J	L
O	F	D	F	E	A	P	P	L	A	V	D
L	G	T	W	I	E	H	N	A	C	H	T
L	V	Z	J	K	P	L	K	M	N	T	L
I	B	E	R	R	P	S	U	Q	A	I	H
K	C	K	A	E	L	L	E	R	E	H	D
R	C	I	S	P	I	S	R	C	A	Y	E
6	O	S	A	R	U	Y	I	O	E	P	F
9	R	R	R	O	U	T	E	D	R	F	C
T	T	Z	T	L	R	E	W	E	E	D	G
Z	E	R	F	I	M	H	G	D	D	O	H
J	G	D	Q	N	A	E	L	K	U	O	N
H	E	R	R	E	B	U	M	M	E	L	M
J	M	D	E	W	Z	A	E	M	M	E	K

Ab  ff
d'Gass!

crome.ch

Immer unterwegs für Sie.
www.undernaehrer-ag.ch

Unternährer
Unser Elektroprofi

Rolli unterwäggs / Herrebummel /datum???

Püngtlich zum Herbstferiestart, am 1. Oktober, hän sich e paar glatti Sieche zum Herrebummel 2022 troffe.

Dr Träffpungt uff die 12i in dr Rio Bar am Barfi isch natürlich bereits scho e erschte Höhepungt gsi. D'Bschtellkadänz isch scho relativ hoch gsi, me weiss jo nit, ob's nochhär no öbbis git;-).

D'Spannig isch gschtige, wo dr Schälle und dr Toni gseit hän, dass mir jetzt e Huus wyter göhn. Ab uff e Schlitte, mit em 3er in Richtig französichi Gränze. Mir sin z'Gast gsi bi dr «Hobby Wursterei Basel».

Was in däm unschiinbare Hüttli abgoht isch eifach dr Hammer. Es hän sich e paar Männer zämme do, um in ihrer Freizyt sälber Würscht z'mache.

Wow, do simmer jo gschpannt. Denn jetzt heisst's aapacke. Chuchi-Schürz sin montiert und verschieden Ämtli sin verteilt worde. Uff de Bilder bechunnt me e gleine Yblick, wie das so abgloffe isch. S'Resultat isch beideruckend. Leider hämmer unseri Würscht notürlich nonig chöne probiere. Aber, sie sind im Tiefkiehler und wärde zumene spätere Zytprungt gnosse.



Wyter goht's zum BIERJOHANN, dört hämmer d'Qual der Wahl. 18 verschieden Biersorte stöhn zur Usswahl. Naja, denn dringge mir mol die 18 duure. Neiiii sicher nit, ganz gsittet het jede 1 ussgsuecht. Derzue e feins Plättli.

Nach däm glungene Zvieri hän mir uns wieder uff e wäg gmacht. Warte uff's nächschte Trämli. Zur Überraschig vo allne fahrt e uralts Trämli vor. Ob das plant gsi isch, oder ob dr Schälle dr Chauffeur eifach kennt het, weiss ich nit genau. Egal, e super Fährtli bis an Märtplatz isch is garantiert gsi.

Rolli unterwäggs / Herrebummel / Teil 2

Jetzt goht's mit em «normale» Trämlü wyter bis ins Glaibasel. Es isch jo au scho bald Zyt zum Z'Nachtässe.



In dr Eintracht isch e schöne Tisch für uns reserviert. Was es dört git, liegt jo uff der Hand. Gordon-Bleus mit Pommes warte uff uns. Mhhhhhhhhh, es sei denn me het Chäs nit gärn. Aber au für dä isch gsorgt. E Schnitzel gits nämlich für die Banause.

Super guet hän die das gmacht und dr Plausch hämmer au gha.



Nit ganz überraschend sin mir z'Fuess richtig «Schofegg» verschobe.
Dusse hän mir denn no dä tolli Daag ussklinge loh.

Schön isch es gsi. E liebe Dangg an d'Organisatore, em Schälle und em Toni.

Aldo

GUTZWILLER
GARTENBAU

Walter Gutzwiller GmbH
Drosselstrasse 21 | 4106 Therwil
Tel. 061 721 37 88
www.gutzwiller-gmbh.ch

E Ära goht z Änd - Und e NeuI fangt aa?

Am letschte Samschtig im Septämber het sich e Grossteil vo de Rolli-Fraue am zwei bim Dreispitz troffe. Vo dörte uss sinn mir e paar hundert Meter wyt gloffe und hänn uffm Dreispitz-Areal e kleine Apéro und öbbis z Tringge griegt. Dr Teil vom Überraschigsprogramm isch immer nööcher koo und mir alli hänn uns gfrogt: Was genau kamme denn do in dr Nööchi überhaupt mache?

S einzige wo mir gwüsst hänn isch gsii, dass mr worschinlig e biz wärde schwitze und dorum doch bequemi Kleider sölle traage und e zweits Tshirt drbii ha... Wandere, Fitness oddr doch Bowle...? Mmmhh, nit ganz.

S Fitness isch wohl no am nöggachte draa gsii. Mir sinn nämmelig go Hüpfdoole-Danze - oddr wie mes au nennt - go Highland Dancing ussprobiere. Do mir die neggschte Joor uffgrund vom Tattoo-Turnus worschinlig nümme in dr Tatoo Street sii wärde (zumindescht nit miteme Stand), het s OK gfunde, dass mir uns mit dämm ganze Thema jetzt no e biz tiefer usenandersetze mien.

D Carol vo de Basler Highland Dancers het uns während öbbe einehalb Stund d Basics vom Highland-Dancing biibrocht und mit uns e kleini Choreo iistudiert.



Rolli unterwäggs / Frauebummel / Teil 2

Was drbii uusekoo isch, das isch nit emoll so schlächt gsii. Das hänn zumindest mir gfunde. Was sich d Carol genau dänggt het, dass wänn mir vilicht lieber gar nit wüsse :').

Mir hänn uffjeedefall tatsächlich zimmlig gschwitzt, abr mir hänn au alli e sau Freud gha. Belächle wärde mir die Hüpfdohle am Tattoo uffjeedefall nümme, erscht rächt nümme, nachdämm mir am neggschte Daag denn au gwüsst hänn, was für e Muskelkater me in de Waade griegt vo dämm um-megehüpfe.

Usspoweret und mit grossem Hunger, hänn mir uns denn uff e Wääg gmacht zumene neggschte Apéro. Dä het - passend zum Tattoo-Thema - in dr Kasärne stattgfunde, genauer gseit, in dr Kabar. Dörte sinn mir reegelrächt verwöhnt worde. S het z Tringge und vor allem ganz vill z Ässe geh - i glaub, die Meischte hät- te nit emol meh e znacht bruucht.



Dr neggschti und letschti Halt isch denn im Gliquekäller gsii. Dörte hänn mir alli zämme Znacht gässe. Geh hets feini Saläter, Schingge im Teig und zum Schluss no ganz farbigi Mini-Cupcakes.




S isch e sehr e glungene Daag gsii!
Und wär weiss, vilicht gsehn mir
neggschtjoor jo die eint oddr ander
Rolli-Dame inere Highland-Dan-
cing-Formation am Tattoo.

Lara P.

REPROLINE

DAS PRINTCENTER IM GUNDELI / BASEL

**Wir drucken nicht nur
Cliquenbroschüren!**




Bruderholzstrasse 40
4053 Basel
061 366 99 99
info@reproline.ch
www.reproline.ch

Am 15. Dezämbler uff die halb Achte hän mir uns im Fondue-Stübli im Kunsthalle Garte troffe und uns z'erscht emol über dr Apéro här gmacht. Nach eme erste Hallo und e bitz pläuderle hän denn alli e Plätzli gfunde und scho bald het's e Salätli gäh. D Freud uff e feins Fondue isch denn gstiege und bald druff abe, hän mir die dampfende Caquelon uff em Tisch stoh gha. S Wätter het au super dazu passt, het's doch ständig licht gräget und es isch rächt kalt gsi. D Raucher hän dorum nach em Ässe in dr Zigi-Pause dusse im Garte rächt müesse uffpasse, dass sie kei unfreiwillgi Denis-Bielmann-Piroutte aneglegt hän. Sowiet ich weiss, het's aber keine uff d'Nase glegt gottseidank. So gege die halb Zähni het denn unseri Sujetkommission dr Kampf mit dr Technik in Agriff gno und nach eme harte ringe am Schluss doch no gwunne und mir hän unter viel Glächter erfahre, was unser Sujet isch :) D'Begeisterig isch gross gsi und ich glaub es freue sich alli, dass es wieder e kleins Halblärvli und kei Overall git. Einige Dame hän sich denn au scho Gedanke zu blauem Nagellack oder Lidschatte gmacht, um das Sujet no könne uffzeppe. Ich glaub, do sind dr Fantasie keini Gränze gsetzt und mir könne gspannt si, was do no alles an kreative Idee kunnt. Uff jede Fall isch d'Vorfreud uff d'Fasnacht riesig gsi und no-di-no sinn mir denn langsam heime trudlet bzw. dank em Ysyräge grütscherlet.

Karin





Lieblings, he?

ev Inserat Carmen

Basler Rolli, Répertoire – Fasnacht 2023

S=Stamm, A=Alti Garde, J=Jungi Garde, B=Binggis

Tempi: 1= gmietlig ca. 86/ 2= mittel ca. 96/ 3= zaggig ca. 112

1	MORGESTRAICH	S	A	J	B	
1	ALTI SCHWYZER / 10.Värs	S	A	J	(B)	B: nur Dambuure
2	ARABI	S	A	J	B	
1	RYSLAIFER	S	A	J	B	
2	RETRAITE	S	A	J	(B)	S/J: Dambuure Y- / Usleitig B: nur Grundmotiv
3	AUPRES (Tv)	S	A	J	-	
2	DUDELSAGG	S	A	J	-	
1	GLOPFGAISCHT	S	A	J	-	
2	NAAREBASCHI	S	A	J	-	
2	ROUTE SYMPHONIE	S	A	J	B	
3	SAMBRE ET MEUSE (Tv)	S	A	J	-	
3	UNGGLE SAM (Tv)	S	A	J	-	
2	WHISKY SODA (Tv)	S	A	J	-	
3	BASLER MARSCH	S	A	-	-	
2	BRITE 79 (Tv)	S	A	-	-	
3	COPAIN (Tv)	S	A	-	-	
1	FESTSPIEL / Wettstaimarsch	S	A	(J)	(B)	J/B: nur Wettstaimarsch
2	FESTIVAL	S	A	-	-	
2	HANSDAMPF	S	A	-	-	
3	KEENIG (Tv)	S	A	-	-	
3	LE LANCIER (Tv)	S	A	-	-	
3	MONTY (Pv)	S	A	-	-	
2	OHREMYGGELI	S	A	-	-	
2	ROSSIGNOL	S	A	-	-	
3	SIXTY NINE (1969) (Tv)	S	A	J	-	
3	VOILÀ	S	A	J	-	
3	APOLLO	S	-	-	-	(sistiert)
2	HOFNAAR	S	-	-	-	
2	SPALEBÄRG	S	-	-	-	Pfyffermarsch (sistiert)
(Tv)=Dambuurevorschiil , (Pv)=Pfyffervorschiil						
Drummelmärsch:		Rotationslichte Stamm in Arbet				
2	UELI	S	A	J	-	
2	CELANESE	S	A	J	-	
2	MÄTZLI	S	A	-	-	
2	BASEL NORD	S	-	J	-	
2	DÜSEFÄGER	-	A	-	-	
2	DREIER	-	A	-	-	
2	WALLISER	-	-	J	B	Värs 1-8



Routeplan **Stamm**



Routeplan **Jungi Garde**



Routeplan **Alti Garde**

Geschätzte Leserin, lieber Leser

Drei erwähnenswerte Ereignisse haben die erste Hälfte des Cliquenjahres bestimmt. Dass bereits im Juni die Laterne gelatinierte werden sollte und an Mimi übergeben wurde ist als starkes Vorzeichen der kommenden Jubiläumsfasnacht zu vermerken. Und so war männiglich auf die Herbstversammlung und die Sujet-Präsentation gespannt. Mehr soll dazu aber (noch) nicht verraten werden.

Dass Maja Reichenbach nun definitiv die Instruktion bei den Pfeiffern übernommen hat ist sicher das zweite Highlight. Nicht nur der überragende Stundenbesuch und das konzentrierte



und durchaus auch lustvolle Arbeiten mit ihr sind Zeichen der neuen Zeit, nein auch die beiden höchst gelungenen gemeinsamen Proben mit dem ganzen Spiel.

Nun ist es ja so, dass der eine oder andere Rolli schon die Wege von Maja gekreuzt hat. Mich persönlich hat es aber wundergenommen, wer Maja wirklich ist und was sie so bewegt, motiviert und auch zu dem macht wie wir sie alle schätzen gelernt haben. Ich habe mich darum aufgemacht und mit Maja ein kleines Interview vereinbart. Hier das Ergebnis!!

Liebi Maja, Du bisch de Rolli scho meh als eimool übere Wäg gloffe. Viili kenne Di und wüsse doch nid ganz genau, wär Du bisch. Dorum do e paar Frooge zu Dir und Dinnere Person



Wo bisch Du uffgwage und gross worde?

Bsunders grooss bin ych jo nit worde. Doch myni Haimet isch s Glaibasel und do füül ych mi wool.

Was hesch Du gleert und wele Brueff üebst Du hüt uss?

Dr ainzig eidgenössisch Faggel näb em Maturaazüügnis isch d Fahrleherbewilligung. Ych gib seer gärn Autifaarstunde, allerdings fascht historisch (handgschalte). Ych haa in dr Reegel so 6-8 Faarschieler, won ych betreu. Also e wunzig glaini Faarschuel.

Drnääbe spiil ych Wachhund im Hafemuseum, wo ych jede Zyschtig am Empfang schaff. Syt em 2017 fiehr ych im Haafe schoo d Lüt ummenander und vrzell dääne d Gschichte zem Hafe.

Syt em 2015 oder so, gseet me mi au vyyl in dr Brauerei Fischerstuube, won ych au Fiehrige mache darf

Und syt em em 2008 bin ych zem Dail als Stadtfiehrere untwäggs. Zerscht bi Visit Basel und jetz mit em aigene Verain «Stadtfiehrer Basel».

Drnääbe gib ych e baarne Pfyffstunde.

Jo, y glaub jetz haa ych alles uffzellt, womit ych momentaan my Gäld vrdeen

Wenn Du Di sälber beschriibe müesstisch (oder wöttisch)?

Dasch glaub die schwiirigschti Froog: Vyyllycht könnst me mi mit ere Comicfigur vrglyyche. Drnoo wurd am eendschte dr Garfild basse: Frech, fett, faul und filosofisch. Daas beschriibt mi glaub relatiiv guet.

Wie bisch Du zur Fasnacht koo? Und wo machsch Du hüt Fasnacht?

Myni erschti Erinnerung an d Fasnacht isch als dreyjeerigs Maiteli uff de Schultere voo mym Babbe dr Moorgestraich mitbekoo z dörfe.

Mit 4 het me mir denn schoo e Stäggeladärne in d Hand druggt und ych haa mi erschti aggdiiwi Fasnacht mit unserem Familieziiglig gmacht. My Brueder het mit mir Vordraab gmacht und myni Eltere hän hinde nooche pfyffe.

.Für mi isch es ganz normaal gsi, ass noo Wyehnacht und Sylveschter alli Bilder im Ässzimmer abghängt und an dääne iiry Stell sin d Nootebletter an d Wand kläbbt worde, drmit myni Eltere, wenn sii denn Marschyebig um dr Ässdisch gmacht hän, jenoodäm hän könne uff d Noote spigge. Erstuunlig ass daas nit in allne Familie praggdiziert wird.

Drnoo bin ych ze de Naarbaschi bis ych in Stamm hät sotte, woruf ych in e grössers Schyssdräggziigli gwäggslet haa «die gäale Daggel», wo zämme mit dr TKF (Tambourenkapelle Frohsinn) Fasnacht gmacht hän.

Vor bald emool 10 Joor, hän mir uns dört allerdings abgspaltet und e Sälbschthilfegrubbe gründet. Sythär bin ych bi de anonyme Piccoholiger.

Isch s Mitwirke in ere grossi Stamm-Clique nie e Ziel für Di gsi?

S Mitwirgge? Sälber drby sy oder Inschtruiere?

Ych bi uss de Naarbaschi uuse, won ych hät in Stamm go sotte. Mir isch dr Stamm z grooss gsi. Ych mach schregglig gärn mit dääne Mensche Fasnacht, won ych sunnscht au gärn zämme bi. Und als Grubbe in ere grössere Ainhait, hät daas für mi nit basst. Ych bi sällmool uff dr Suechy gsi noo öbbis flexiiblerem, won ych drotzdäm nooch an dr Fasnacht draa bi.

Inschtruggzioon: Ych haa mit 19 /20 d Giftschnaigge inschtruiert ghaa, was nit esoo guet uusekoo isch, well ych für ainigi für däa Job z jung gsi bi, und daas hän sii mir z gspüüre gää, werum ych mir e diggers Fäll haa zueleege miesse.

Bis noo vor Corona haa ych die Aagfrässene dr Stamm instruiert. Doch ych haa denn miesse yygsee, ass daas für mi nümme goot. My Inschtrug-dgoorehärz isch nit glügglig gsi drmit, ass ych nümme d Möögligkait ghaa haa mit den Aagfrässene daatsächlich bis an d Premiere vom Drummeli jewiils z yebe und au hinter dr Büüni für se doo z sy. Daas well ych mi Pfyffer- und Vorfasnachtshärz ans Marionette-Theater vrloore haa, wo ych syt s dr Källerstraich git, uff dr Büüni pfyffe due. Und daas loo ych mir momentaan voo niemerem nää.

Dorum wird ych für die näggschte Joore kai Stammclique mee übernää.



Was het Di motivieret e Top-Pfyffere zwärde und wieviil muesch Du eigentlich üebe?

Was isch denn e Top-Pfyffere? Ych haa unglaublich Spass an dr Fasnachtsmusig, am Piccolo spiile und s letschte bitzeli uss dääre primitiive Flööte uusezquetsche. Daas het sich esoo ergää.

Ych haa syt ych aagfange haa z pfyffe d Creme de la Creme voo de Piccolinschtruggdoorewält ghaa. Wenn denn au noo innerhalb voo dr Grubbe tolli Lüt drby gsi sin, drnoo het aim daas aifach mitzooge und mitdrait.

Wievyyl ych yebe muess?! Miesse?! Dasch doch kai Miesse! GRINS. Es kunnt halt au immer e weeneli druff aa, in wellere Jooreszyt mir uns grad befinde. Prinzipiell bin ych en unglaublich fuuli Sau und yeb nit gärn....vor allem au nit ellai. Ych due usser, wenn ych uff Kondition trainiere (drmit me an dr Fasnacht vyylyllycht au emool 4 Märsch hinterenander spiile kaa) kuum ganzi Märsch duurespiile. Doodrfür isch mir d Zyt z knapp. Soo nimm ych mir ai Värs vom ene Marsch vor, mänggmool au nur e baar Täggt, won ych denn wirgglig genauer aalueg. Ych wurd emool schetze wäärend 5 Moonet im Joor yeb ych 40 Minute pro Daag.

Mit den Inschtruggzioone und Einzelstunde kumm ych aber noo e weeneli mee zem Pfyffe.

Spiilsch Du eigentlich au no e anders Instrumänt?

Ych haa 3 Joor Querflööte gspiilt, bevor myni Eltere gfunde hän, ass für daas, was sii für dr Unterricht zaale mien, ych vyyl z weenig yeb. So haa ych denn mit 14 s Böggli voo mym Brueder gerbt, well däa nümm het welle drummle und bi zem Schlebach in Drummelstunde gange. Noo zwai Joor haa ych denn s Junge Repertoire druff ghaa und bi daatsächlich ai Moorgestraich mit dr Drummle an dr Fasnacht ummegstolperet. Allerdings muess me zuegestoo, ass d Qualideet nit ganz esoo toll gsi isch. Und ebbe. Ych bi fuul. Es isch unglaublich vyyl aagnäämer e Piccolo in d Stadt z schleppe, als e Drummle. My Rugge danggt s mir!

Alti Garde / Neys bi de Alte / Teil 5

Worum duesch Du Dir zum Instruiere e Alti Garde und ussgrächnet d Rolli aa?

Ych haa im Summer 2021 e Delyfoon bekoo mit dr Aafroog, ob ych Euch nit könnti koo inschtruiere. Und ok d Wurlizzer Zunzge hän mi denn au aagfroogt ghaa....aber uff d Zunzgen uuse?! Nai. Die ander Clique wär denn wiider e Stammclique gsi, won ych ebbe kaini mee übernim. Und denn het sich s halt esoo ergää, ass ych ze Euch koo bi. Vor allem haa ych mi schregglic druff gfreut, well ych jo schoo e baar vo Euch kennt haa!

Was mache mr guet was könnte mr besser mache?

lir händ en unglaublich Yebigs-presänz. Ych find daas absolut geniaal, wie lir probieret myni Yebigs-vorschleeg aaznäa und se umzsetze. Ych haa s Gfüül, ass lir e tolle Zämmehalt hän und däa überdrait sich loogischerwiis au uff s Pfyfferische.

Was lir besser machet könntet? Noo besser uffenander yygoo und zämme Muusig mache welle. Uffenander loose. Und jede/i sott sich doch sälber an dr Naase näa und nit ussriefe, wenn e Marsch aagsait, wo me vyylycht nit esoo ganz gärn spiilt! Do wurd ych mi freue, wenn me daas abstelle könnt.

Und no e kleini Gwüssensfroog. Mir hän jo gärn s Gfühl mir sige e eher überdurchschnittliche und au musikalisch gueti Alti Garde. Dich-te, Traum oder Wohret?

Wänn lir d Wooret wirgglic ghööre? Guet!!

Objeggdiiv kaa ych daas nit saage. Doo kenn ych vyyl z weenig anderi Alti Garde, won ych esoo zueloose wurd.

Und subjeggdiiv wurd ych Euch doch nie mit andere alte Garde vrglyche! Doch nit mit däm Repertoire und mit däm Sound, wo lir druff händ!!

Was wär Di Wunsch wo Du mit uns erreiche möchtestich?

Ass lir Spass draa hand in d Yebigsstunde z koo und ass lir sälber au Freud draa bekömmet, wenn lir immer wiider feschtstellet, ass es immer wiider e bitzeli Preziiser wird, e weeneli melodiööser und s blötzig au lyychter wird.

No e letschte persöönliche Kommentar oder Bemerkig?

Fallt mit grad nüt yy. Freu mi druff, euch an dr Fasnacht denn emool z ghööre.

Ganz härzlige Dangg und au witerhin guets Glinge!!

Wir sind ganz sicher, dass uns auch in Zukunft das Arbeiten mit Maja nicht nur Spass machen wird, sondern auch Freude und Qualität in der Gruppierung heben wird. Auf gutes Gelingen also.



Und als dritten Punkt soll hier das Weihnachtsessen erwähnt werden. So zu sagen als Auftakt zum kommenden Jubiläum war es den Organisatoren Emme und Andi Anliegen und auch Anspruch, den Anlass in diesem Jahr auch in einem speziellen Rahmen zu organisieren. Und so fand sich dann eine fröhliche und gut aufgelegte Schar von Altgardisten im Keller des Stammvereins der ‚Verschnuufer‘ an der Malzgasse

ein. Apéro natürlich, dann ein feines Buffet mit Schinken im Teig begleitet von Salaten und zum Dessert eine Linzertorte. Herz was willst Du mehr!! Die Stimmung fröhlich, herzlich, ausgelassen, typisch BRAG halt. Der trefflich gesungene Vers von Schilby und Christian nach der Melodie vom ‚Sidi Abdel‘ hat das Seine dazu beigetragen.

Ein würdiger Abschluss für eine schönes Cliquenjahr und eine kleines Schmankerl als Vorgeschmack für das kommende Jubeljahr. Und dass dann alle den Heimweg bei spiegelglatter Strasse unfallfrei geschafft haben ist auch eine Erfolgsmeldung wert.

Herzlichen Dank dem OK für den tollen Abend.



Und so schliessen wir das Jahr 2022 langsam ab und sehen gespannt in die Zukunft und die Monate bis zur Fasnacht mit wohl manchen gemeinsamen Stunden.

In diesem Sinne, Prosit Neujahr!!!

Ufleesig vom Woträtsel

Die Wörter sottisch gfunde ha:

- Rolli
- Zaemme
- Cortege
- Marsch
- Raepli
- Herrebummel
- Reproline
- Route
- QRCode
- Hypfdoole
- Wiehnacht
- Kaeller
- 69



Planung schafft Zukunft.


Seit mehr als 125 Jahren steht der Name Rapp für passgenaue Lösungen im Kontext bebauter Umwelt. Als unabhängiges Familienunternehmen fokussieren wir auf die Bedürfnisse unserer Kundinnen und Kunden und entwickeln nachhaltige Konzepte zur zukunftsgerichteten Gestaltung von Lebensräumen.

Wir vereinen vielfältige Qualifikationen unter einem Dach: Spezialistinnen und Spezialisten aus den Bereichen Architektur, Infrastruktur, Energie, Mobilität und Logistik erarbeiten in interdisziplinären Teams intelligente Lösungen aus einer Hand.

Werfen Sie einen Blick: www.rapp.ch

Rapp AG | Hochstrasse 100 | 4018 Basel

Ihr **Wein-** und **Getränke-** **Lieferant**



Theo Rietschi AG
Getränke en gros



Hahn-Rickli AG
Weinkeller

Schwarzes Brätt



Adrässänderige
bitte an
baslerrolli@gmail.
com schigge, merci



D Online Version vom
letschte Voilà bein-
haltet die korräggti
Version vom AUCA
Brycht. Äxgyysi für d
Verwäggsli!

Näggschti Usgo

- Offiziells
- Charivari
- Laaferi
- Fasnacht
- Bummel